

Ministarstvo za boračka pitanja

Na osnovu člana 45. Zakona o dopunskim pravima boraca - branitelja Bosne i Hercegovine ("Službene novine Kantona Sarajevo", broj 45/12-Prečišćeni tekst), ministar za boračka pitanja Kantona Sarajevo, donosi

PRAVILNIK

O IZMJENI PRAVILNIKA ZA DODJELU STANA U VLASNIŠTVO ILI DODJELU STANA NA KORIŠTENJE

Član 1.

U Pravilniku za dodjelu stana u vlasništvo ili dodjelu stana na korištenje ("Službene novine Kantona Sarajevo", broj 17/12) u članu 6. stav 4. mijenja se i glasi:

"(4) Pod pojmom da ratni vojni invalidi I grupe, ratni vojni invalidi koji su radno nesposobni po osnovu rane ili povrede zadobijene za vrijeme službe u Oružanim snagama RBiH, kao i djeca šehida-poginulih boraca - branitelja i umrlog ratnog vojnog invalida, koja su bez oba roditelja, a kako je to propisano u članu 42. Zakona, nemaju riješeno stambeno pitanje na način koji zadovoljava njihove potrebe podrazumijeva se da je veličina stambene jedinice koju isti ima manja u odnosu na utvrđenu veličinu stana u skladu sa stavom (1) člana 5. ovog Pravilnika ili je zbog spratnosti teško dostupna."

Član 2.

Ovaj Pravilnik stupa na snagu danom objave u "Službenim novinama Kantona Sarajevo".

Broj 06-02-28820/12
15. novembra 2012. godine
Sarajevo

Ministar
Mr. Vahid Karavelić, s. r.



USTAVNI SUD FEDERACIJE BOSNE I HERCEGOVINE

Ustavni sud Federacije Bosne i Hercegovine, odlučujući o zahtjevu načelnika Općine Olovo za zaštitu prava na lokalnu samoupravu u vezi sa Zakonom o zdravstvenoj zaštiti, na osnovu člana IV.C.10.(3) Ustava Federacije Bosne i Hercegovine, a u vezi sa Amandmanom XCVI na Ustav Federacije Bosne i Hercegovine, nakon provedene javne rasprave, na sjednici održanoj 16.10.2012. godine, donio je

PRESUDU

1. Utvrđuje se da je član 53. stav 5. Zakona o zdravstvenoj zaštiti ("Službene novine Federacije BiH", broj 46/19), povređuje pravo na lokalnu samoupravu Općine Olovo.
2. Presudu objaviti u "Službenim novinama Federacije BiH" i službenim novinama kantona u Federaciji Bosne i Hercegovine.

Obrazloženje

1. Predmet zahtjeva

Načelnik Općine Olovo (u daljem tekstu: podnosilac zahtjeva), dana 08.03.2012. godine i urgencijom za prioritarno rješavanje i donošenje privremene mjere od 12.06.2012. godine, podnio je zahtjev za zaštitu prava na lokalnu samoupravu (u daljem tekstu: zahtjev), Ustavnom sudu Federacije Bosne i Hercegovine (u daljem tekstu: Ustavni sud Federacije), smatrajući da je odredbama člana 53. stav 5. Zakona o zdravstvenoj zaštiti ("Službene novine Federacije BiH", broj

46/10), (u daljem tekstu: osporena odredba zakona) povrijeđeno pravo Općine Olovo na lokalnu samoupravu.

2. Bitni navodi zahtjeva

U zahtjevu je istaknuto da je Općina Olovo osnivač i vlasnik u sto postotno procentualnom učešću od 2001. godine Javno-zdravstvene ustanove banjsko-rekreativni centar "Aquaterra" Olovo, te da se radi o ustanovi koja obavlja djelatnost fizikalne medicine i rehabilitacije. Registrovana je kao zdravstvena ustanova. Podnosilac u zahtjevu tvrdi, da se donošenjem Zakona o zdravstvenoj zaštiti u 2010. godini, mijenjaju odnosi prema lokalnoj zajednici, te se osporenim odredbom zakona, kojom je propisano da općina može biti osnivač doma zdravlja, ustanove za zdravstvenu njegu u kući i apoteke, mijenja pravno stanje i općini se isto uskraćuje, tako što više ne može biti osnivač lječilišta kao javne zdravstvene ustanove. Naime, odredbom člana 53. stav 4. citiranog zakona, Zeničko-dobojski kanton postaje osnivač bolnice, lječilišta, zavoda za javno zdravstvo, zavoda za medicinu rada kantona, zavoda za bolesti ovisnosti kantona, zavoda kao specijalizirane zdravstvene ustanove, doma zdravlja, apoteke, ustanove za hitnu medicinsku pomoć i ustanove za zdravstvenu njegu kući. Podnosilac zahtjeva je također naveo, da je Prelaznim odredbama navedenog zakona, članom 234. st. 1. i 4., izvršena povreda prava koja pripada Općini Olovo, jer su ovim odredbama propisani rok i način uspostavljanja novog pravnog stanja u pogledu osnivačkih prava nad zdravstvenim ustanovama, kao i način finansiranja istih.

Prema mišljenju podnosioca zahtjeva, osporenim odredbom ovog zakona, povrijeđeno je pravo općini na lokalnu samoupravu i u odnosu na član 4. stav 6. Evropsku povelju o lokalnoj samoupravi, kao i u odnosu na odredbe člana 8. stav 3. Zakona o principima lokalne samouprave u Federaciji Bosne i Hercegovine ("Službene novine Federacije BiH", broj 49/06), jer pri pripremanju i donošenju zakona, lokalne vlasti nisu konsultovane na odgovarajući način, niti su učestvovala u procesu planiranja odluka o stvarima koje ih se direktno tiču. Također, u zahtjevu se elaborira i stav 6. osporenog člana zakona, jer odredbe ovog člana ostavljaju mogućnost općini da bude u svojstvu suosnivača lječilišta u mješovitom vlasništvu.

Iz svega navedenog podnosilac zahtjeva predložio je da Ustavni sud Federacije, donese presudu, kojom će utvrditi da je osporenim članom zakona povrijeđeno pravo Općini Olovo na lokalnu samoupravu, te da ovaj Sud donese prelazno rješenje, na osnovu člana IV.C.12.b) Ustava Federacije Bosne i Hercegovine, kojim će Parlamentu Federacije Bosne i Hercegovine dati mogućnost, da u roku od šest mjeseci, od dana donošenja ove presude uskladi osporenu odredbu zakona sa ovom presudom.

3. Bitni navodi odgovora na zahtjev

U skladu sa članom 16. Zakona o postupku pred Ustavnim sudom Federacije Bosne i Hercegovine ("Službene novine Federacije BiH", br. 6/95 i 37/03), Ustavni sud Federacije dostavio je dana 26.03.2012. godine zahtjev drugoj strani u postupku, donosiocima navedenog zakona, Predstavničkom domu i Domu naroda Parlamenta Federacije Bosne i Hercegovine. Druga strana u ovom postupku se nije očitovala na navode zahtjeva.

4. Sjednica Suda sa javnom raspravom

Javna rasprava u ovom ustavnosudskom predmetu, na kojoj su prisustvovali punomoćnici podnosioca zahtjeva, održana je 16.10.2012. godine.